

Ban duna respet y digno homenahe na nos simbolonan nacional

(Parti 2)

ORANJESTAD (AAN): Tur ciudadano mester tene cuenta cu algun regla y normanan internacional encuan to hisa bandera y canta himno nacional.

En bista di tur e atencion cu nos simbolonan nacional ta ricibiendo, ata aki e di dos den un serie di articulonan cu meta di concientisa comunidad di algun regla y normanan internacional. E capitulo aki ta saca for di Protocol di E Simbolonan Nacional, cortesía di Consulado di Portugal na Aruba, produccion di Luso-Arubiano, maart 2002. Ademas di esaki tin varios fuente mas di informacion encuan to regla, norma y protocolo cu comunidad por acudi na nan como referencia.

Tin tratado nacional y internacional cu ta regla e uzo di e himno nacional. P'esei mester tene na cuenta cierto regla ora ta toca, canta of scucha e Himno Nacional. Ata aki algun di e costumbe y reglanan cu mester respeta.

Balor di un himno: E himno y e bandera ta e identificacion di mas balor cu un ser humano tin di su


patria. Bo pais of bo patria bo no por hib'e ningun caminda cu bo, pero bo himno y bandera si. E dos simbolonan aki ta esunnan cu ta pone un ser humano sinti'e orguyoso di ta forma parti di un pais, den su momentonan di gloria y tristesa.

Con leu bo por ta di bo pais, na momento cu bo tende bo himno resona, e ta trece un alegria inmenso den bo curason.

Un himno no ta un simpel cancion, e ta un composicion cu palabra cu semper ta papia di un pais; su cultura, costumbe y logro, etc. Un himno ni su melodia ta bira bieu, manera otro cantica cu ta valido durante cierto epoca so.

Como un bon ciudadano bo mester conoce e letra (e palabranan) di bo himno for di memoria. Si otro cantica bo ta canta cu miedo, bo himno si bo ta canta cu henter bo curason y ta lag'e Sali cu un sentimento patriótico. Un himno ta haci bo stima bo pais hopi mas.

Con ta canta un himno: Lanta para, cara pa e bandera, keda para keto y cu respet mientras ta toca of



canta himno, incluyendo esun di e pais bishitante. Memorisa e palabranan y canta bo propio himno cu respet y cu aprecio. Canta e palabranan correctamente y den e secuencia corecto. Canta himno di un pais stranhero ta opcional.

No ta permiti pa cambia palabra, ni ritmo, ni melodia di un himno. E himno 'Aruba Dushi Tera' ta skirbi den un compas di ¾, un wals modera, cu mester canta na un manera mahestuoso y respetuoso.

No huma, ni bebe, ni kou

bals, ni cana, ni papia, ni baila, ni yanga, ora ta canta un himno. Ora di canta himno, mester canta tur tres couplet. Si ta toca e himno instrumental, anto ta permiti pa toca un solo couplet, mas e refrain. Den e acto protocolario e mesun persona, grupo of orkesta cu ta canta e himno na apertura di e programa, mester cant'e of toc'e na clausura di e programa.

con un persona ta scucha un himno: Na promer lugar na momento cu anuncia e himno

tur hende homber, hende muher y mucha TA LANTA PARA. Hende homber ta botona of cera su flus y si e tin sombre of pechi bisti, e ta kita esakinan. Hende muhe por keda cu nan sombre bisti. NO ta permiti BAILA NI MOVE riba ritmo di un himno.

Hende homber, muher y mucha ta scucha un himno cu nan mannan colga na cada banda di nan curpa. E man no mag ta crusa, tampoco tras di lomba, pero na cada banda di bo curpa of sea den forma di guardia.

Tambe bo por pone man drechi na curason como muestra di sentimiento patriótico. Bo wowonan bo ta fiha stret bo dilanti cu bo cara na laira y no ta canta e himno moviendo bo cabes. Tambe bo por fiha bo bista ariba e bandera si e t'ei, of ariba e persona cu ta cantando e himno, of ariba e persona principal para bo dilanti ariba e escenario. Despues cu e himno termina, normalmente no ta aplaudi esaki, bo mester keda mantene e respet.